

ՄԱՐԴ ՉԵՍ, ՄԱՐԴ ՉԵՍ ԴԱՌՆԱ / Հայ ժողովրդական հեքիաթներ, Հատոր VIII / Գուգարք (Լոռի), Լոռու բարբառ (խոսվածք)

Շատ հնրւմ, դեռ Նիկոլից էլ աղաք, դեղացի մարթի մինը մի տղա յա ունենւմ: Էս տղեն թոգից փախածի մինն ա ըլլւմ ոչ ըշխատւմ ա, ոչ էլ տանը մի օքուտ ա տալի: Մի խոսքով, սալախանի մինը: Հերն ա խրատւմ, բան չի դուս գալի: Ըռավողվանից, լիսը բաց ըլելու հետ, մինչի բիգու հնգորտանց հետ հաղ ա անւմ:

Դրա հըմար էլ հերը տղին ասւմ ա.— Մարթ չես, մարթ չես դառնա:

Էս խոսքը ամեն հետ տղի ըրեսին շըպպացընւմ ա: Դէ ինքը ըշխատող մարդ, սիրտը դիմանւմ չի, մտածւմ ա, որ ըսօր իրա ձեռ ու ոտը սաղ ա, հա՛մ իրան ա պահւմ, հա՛մ էլ կնգանն ու տղին, էքուց-էլոր, որ ձեռ ու ոտից ընգնի, իրանց հալը ո՞նց կըլի:

Մի օր էլ, եփ հերը տղի գլխին ամեն հետվա խրատն ա կարդալիս ըլլւմ, տղին ասւմ ա. «Մարթ չես, մարթ չես դառնա», Էս բեղովլաթը թողւմ ա տունն ու գլուխն առնւմ, կորչւմ ա:

Տանիցը հեռանալուն եղը, Էս տղեն սալախանի պես դես ա ման գալի, դեն ա ման գալի, վերչը մի առուտուրականի ա ռաստ գալի: Դրա կշտին ծառայության ա մտնւմ ու, արի ու տես, բախտը բանւմ ա: Ինքն էլ բոյով-բուսաթով, սիրուն տղա յա ըլլւմ, առուտուրականին դիր ա գալի ու մի երկու տարուց եղը դառնւմ ա հարուստ առուտուրական: Ըստի են ասել. «Բախտը խելքի աղաքն ա ընգնւմ»:

Թե ոնց ա պատահւմ, Էս տղեն առուտուրի վախտը մի իշխանի ա ռաստ գալի: Իշխանը մտածւմ ա, որ «Էսա ոտս գերեզմանւմն ա, աղջիկս էլ հասած աղջիկ ա, սա էլ սիրուն, բոյով-բուսաթով, դոչաղ տղա յա, փեսա կանեմ, ինձանից եղը օջախս կծխացնի»:

Թեեւց էլ անւմ ա: Քոռին էլ ինչ ա պետք, երկու աչքի լիս:

Մի սիրուն օր էլ տղեն իշխանի ախչկանը ուզւմ ա: Աչքդ բարին տենա, ինչ նա տենւմ ա: Զուր տեղը չեն ասել. «Գիժը գնաց հըրսանիք, ասա՛վ՝ ըստի լավ ա, քանց մեր տանը»:

Իշխանի փեսա յա դառնւմ ու իրա հմար քեփ ա քաշւմ:

Մի քանի տարուց եղը իշխանը մեռնւմ ա, տղեն նստւմ ա իշխան ու ամբողջ հարստութիւնն տեր դառնւմ:

Օրերից մի օր էլ Էս մեր իշխանը հորն ու մորը միտն ա գձւմ: Իրա ծառաներից մինն դրզւմ ա նրանց եղնա, թե.— Իշխանը հրամայել ա, որ իրա կուշտը գնաք:

Տղի ծնողնին արդեն պռաված են ըլլւմ, ոտից ձեռից ընգած: Զանները դող ա ընգնւմ, հենց որ հրամանը լսւմ են:

Մտածւմ են, թե, ախպեր, Էս ի՞նչ բան ա, որ իշխանն իրանց կանչւմ ա, մինն մի գեշ բան չեն արել, մնի հալին քար չեն գձել, մնին վարդով չոռ չեն ասել:

Է, ինչ տեն իմանալ, որ իրանց բեղովլաթը իշխան ա դառել, նա յա կանչւմ: Ահ ու դողով ճամփա են ընգնւմ: Գնւմ են հասնւմ իշխանի պալատը:

Ծառաներից մինը նրանց տանւմ ա դուռ իշխանի կուշտը: Էդ պառավնին գլուխ են տալի իշխանին ու ճամփա պահւմ, թե նա ինչ ա հրամայելու, մի կոնից վախւմ են, մի կոնից էլ պել կտրւմ, պալատի ոսկին ու էրծաթը հենց որ տենւմ են:

Մին էլ իշխանը հարցնւմ ա.— Բիձա՛, ինձ ճնանչւմ ե՞ս:

Հերը պատասխանւմ ա.— Չէ, պարոն իշխան ջան, անըմդ լսել ի, համա քեզ տեհել չի:

Դէ խեղճը ոնց տեր ճնանչի, պռավել էր ու չալկով էր ման գալի, աչքերը պոշացել ին, կնիկն էլ՝ իրա օրին:

— Ա հեր, քու տղեն եմ, բա ասում իր՝ մարթ չես, մարթ չես դառնա՛:

Տղի էս խոսքերի վրա մոր ուշքը գնում ա, դե ինչքան չլի, մոր սիրտ ա, կարոտիցը դիմանում չի: Հերը հանգիստ պատասխանում ա. — Հլեդ ասում եմ, որ մարդ չես, մարդ չես դառնա: Տղեն ձեռաց վրա յա բերում. — Ա՛, հեր, իշխան եմ, մենձ հարըստութիւնի տեր եմ դառել, կնիկս էլ իշխանական տոհմից ա:

Հերը դրան պատասխանում ա. — Տղա ջան, իշխան ես, համա մարդ չես:

Տղեն զըրմացած հարցնում ա, թե. — Ընչի՞:

Հերը քո գիդեցածի պէս դրան մի լավ նալում ա:

— Այ որդի՛, բա որ մարդ ըլէիր, — ասում ա հերը, — էս պառավ հալով ծնողներիդ ոտով հասցնիլ չիր ըստի, այլ ինքդ կգէիր, մի հատ էլ կառեթ կբերէիր, մեզ կնստացնէիր, ու առոք-փառոք կբերէիր հարսիս ու թոռներիս կուշտը, կարքին դոնախլըդ կանէիր, էս էլ կտենայի, որ մարդ էս դառել, մորդ հետ կուրխանէի: Չէ՛, բալա ջան, մարդ չես, մարդ չես դառնա:

Ասում ա ու պառավի հետ դուս գալի պալատից: Խեղճերը լաց ըլելով գնում են իրանց արևի ձենն ածեն, բեղովլաթ տղի լեզուն էլ պապանձվում ա, թե հորն ու մորը տուն կանչի:

Աստված չանի, որ ձեզ էլ սհենց զավակ պատահի, ամեն բանի վերջը մարդկութիւնն ա: